

大（一）乘道因

如來說

標

若我弟子，隨信，信增上者，依明信已，隨順法智而得究竟。

示

隨順法智者，觀察施設根意解境界，觀察業報，觀察阿羅漢眠，觀察心自在樂禪樂，觀察阿羅漢辟支佛大力菩薩聖自在通，此五種巧便觀成就。

於我滅後未來世中，若我弟子隨信信增上，依於明信隨順法智，自性清淨心，彼為煩惱染污，而得究竟；是究竟者，入大乘道因。

結

信如來者，有如是大利益，不謗深義。

請說

爾時勝鬘白佛言：更有餘大利益，我當承佛威神，復說斯義。

許說

佛言：便說。

勝鬘說

正說

讚歎三善

勝鬘白佛言：三種善男子善女人，於甚深義，離自毀傷，生大功德，入大乘道。何等為三？

謂若善男子善女人，自成就甚深法智；

若善男子善女人，成就隨順法智；

若善男子善女人，於諸深法不自了知，仰推世尊：非我境界，唯佛所知，是名善男子善女人仰推如來。

降伏餘惡

除此諸善男子善女人已，諸餘眾生，於諸深法，堅著妄說，違背正法，習諸外道腐敗種子者，當以王力及天龍鬼神力而調伏之。

證說

爾時勝鬘與諸眷屬頂禮佛足。

佛言：善哉善哉！勝鬘，於甚深法方便守護，降伏非法，善得其宜，汝已親近百千億佛，能說此義。